

"Prominentenan na Hulanda a bisa mi cu nan lo a desea di tin un Prome Minister manera Mike Eman"



ORANJESTAD (AAN): Diasabra tabatin presentacion di e buki 'Visie, Passie en Lef' di e autor Rene Zwart dilanti Reina Beatrix School. E buki ta bay over di Prome Minister Mike Eman. Varios aspecto di su bida ta bin dilanti den dje. Durante su discurso Rene Zwart a bisa cu prominentenan na Hulanda a bis'e cu nan lo a desea di tin un Minister President manera Mike Eman. Palabranan di hopi peso. Na final di e presentacion Rene Zwart a duna un splicacion cortico

kico a conduci'e na skirbi e buki aki. Un buki cu ya caba ta hayando un acogida grandi a Aruba.

Rene Zwart "Mi ta un periodista parlamentario na Den Haag y loke a ha mi atencion tempo cu e crisis a lanta cabez ta con Hulanda a atende cu e crisis aki y con Aruba a haci'e. Cada un a anda cu e crisis di maneranan totalmente diferente. Mi ta mira bek awor despues di algun aña y ta constata cu na Hulanda ainda cosnan ta bayendo malo. Tin un

desempleo creciente, un deficit presupuestario cu no ta bon, barionan den necesidad ta sigui empobrece, poder di compra ta bahando y tur hende na Hulanda ta di mal beis. Mi ta bishita Aruba cu hopi regularidad y mi ta mira cu barionan ta wordo restaura, centro di ciudad ta wordo mehora, e poder di compra ta drechando y hopi inversion ta tumando luga. E ambiente na Aruba ta uno positivo, ta reina solidaridad y hendenan ta contento y tin confiansa den futuro". Zwart a splica cu el a puntra su mes con bin e diferencia aki. Aruba, un isla chikito cu ta bayendo asina mas miho cu e pais grandi Hulanda. "Esaki tabata pa mi e motibo, simplemente dor di curiosidad, pa bay en busca di e contesta". Asina cosnan a cuminsa cana y un aña y mei pasa Rene Zwart a lansa e idea pa skirbi un buki riba e persona Mike Eman.

Zwart a bisa cu Eman no tabata mucho entusiasmo ora el a trece su idea dilanti. "El a bisa si, pero su wowonan

a bisa no. A tuma mi un aña pa convence pa laga mi skirbi e buki y porfin despues di a masha masha hopi na su cabes el a bisa cu ta bon". Rene Zwart a conta cu durante e sesionnan cu e tabatin cu Prome Minister Eman el a accentua hopi biaha cu e buki no mester bay over di dje, pero over di Aruba. Mescos tambe na diferente ocasion el a bisa-mi pa mi no mester skirbi un buki over di dje, pero mas bien di su ruman Henny, pasobra loke el a haci, ta algo remarcabel. "E buki t'ey. Mike Eman a confiarmi pa haci e trabou aki. Banda di ta

satisfecho, aunke semper por miho, mi ta masha orguyoso di e buki".

Ganashi di e bukinan cu wordo bendi ta bay pa Imelda Hof. Eynan tin un proyecto pa baha e gastonan di coriente cu panelnan solar y energia di biento. E placa ta bay pa esey y asina Imelda Hof por usa loke e tin pa cuida di e muchananan. "Mi ta haya e iniciativa aki fabuloso cu ta pas completamente den e vision di Mike Eman". Pa loke ta skirbi un buki over Henny Eman, Rene Zwart ta keda pendiente.

Diario. - (diarazon 22 di januari 2014). p. 23